

Bonus per il persunal exemplaric

Viafier retica: Onn da gestiun 2016

DA GION NUTEGN STGIER / ANR

■ **Transportà ha la Viafier retica l'onn passà dapliras persunas, persunter han damain automobilists chargia lur autos sin il tren per ir tras il tunnel dal Vereina. La perforaziun dal tunnel d'Alvra va tenor plan. En stgars tschintg mais è l'avertura da la nova staziun da San Murezzan.** La Viafier retica scriva sco l'onn precedent er il 2016 cifras nairas. Cun entradas e sortidas da stgars 353 milliuns francs è sa resultà il davos onn da manaschi in gudogn da 358 000 francs. L'onn precedent era quella summa anc tar 136 000 francs. Contribuì al resultat positiv haja cunzunt l'augment dals passagiers transportads e lura er la summa dal transport da rauba, ha ditg *Renato Fasciati*, dapi stgars in onn directur da la Viafier retica. Danovamain han confederaziun e chantun sustegnì ferm la Viafier retica e quai cun ina summa da 176 000 milliuns francs.

Pajas per ina summa da stgars 150 milliuns francs

Cun var 1500 emploiads è la Viafier retica er in dals gronds patruns dal Grischun, e sulet las pajas da quels muntan a radund 150 milliuns francs. En cumparaziun cun l'onn 2015 èn quai bunamain 1,5 milliuns francs dapli. La raschun per quel augment è er il bonus da 500 francs che mintga emploià da la Viafier retica ha retschet sco renconutschientscha per la buna lavur. Investiziuns e quai betg mo per



L'onn passà ha la Viafier retica gi in bun onn: **Silvio Briccola**, schef da finanzas, **Stefan Engler**, president dal cussegl d'administraziun e **Renato Fasciati**, directur (da san.).

FOTO G. N. STGIER

il tunnel d'Alvra (48 milliuns francs), ma bain er per il material rudlant ed autra infrastruttura ha il manaschi da la Viafier retica fatg l'onn passà per ina summa da 325 milliuns francs. Quai èn 111 milliuns francs dapli che anc en l'onn da gestiun 2015. Tar la sanaziun da la staziun da San Murezzan è la Viafier retica en la fasa finale e la festa d'avertura ha lieu ils 26 d'avust

2017. Sin buna via è il manaschi er da far sin intgins trajects ina lingia dubla, cunzunt sin ils tocs cun pli bler traffic.

Daplis passagiers per il «Glacier Express» ed il «Bernina Express»

Il dumber da las persunas transportadas l'onn passà è s'augmentà per 4% sin pascha diesch milliuns en cumparaziun cun

l'onn 2015. Cunzunt sin las lingias da pendularis en la Vallada dal Rain e sin las lingias principalas tranter Landquart e Tavau e Landquart–San Murezzan è quel dumber s'augmentà considerablain. La svieuta giascha qua tar ina summa da 94,8 milliuns francs, ditg auter bunamain in milliun francs dapli. Er tar las duas «marcas» da La Viafier retica, il «Glacier

Express» ed il «Bernina Express», è il dumber da passagiers stà per in pau pli grond. Las vistas per questa stad e l'atun èn schizunt fitg bunas cun in augment da reservaziuns dad 8% fin 10%. In success per la Viafier retica èn er stads ils Campiunadis mundials da skis il favrer da quest onn a San Murezzan. Quels dis da l'occurrenza ha la «pitschna cotschna» transportà 95 000 persunas en direcziun San Murezzan, in di, ils 11 da favrer 2017, gist 14 500 persunas.

Memia bell'aura

Cun in dumber da 464 000 autos transportads tras il tunnel dal Vereina è quella cifra per 3000 autos pli bassa che anc l'onn 2015. La raschun è quella che cun esser savens bell'aura èn ils automobilists ids sur ils pass dal nord en direcziun Engiadina Bassa. Cun far pli enconuscha la viafier sco med da transport, cun guadagnar novs clients e tgirar bain la clientela èsi stà pussaivel d'augmentar danovamain la svieuta tar il transport da rauba da 14,1 milliuns francs sin da nov 14,7 milliuns francs. Er l'onn che vegn vul la Viafier retica danovamain far investiziuns per intgins milliuns francs cun sanar punts e tunnels e lura cunzunt per trens novs. Remarcabel è lura er quant punctuals ch'ils trens èn cun avair il pli bler tschintg minutas retard. Laud survegn la direcziun da la Viafier retica er per il persunal gentil dals blers passagiers e quai saja in aspect fitg plaschaivel, ha punctuà *Stefan Engler* ier a Cuir.